

四庫全書

集部

欽定四庫全書

集部

松鄉集卷六至十

詳校官庶吉士朱理

侍讀臣孫球覆勘

總校官編修臣王燕緒

校對官檢討臣虞遂

謄錄監生臣張名林

欽定四庫全書

松鄉集卷六

元 任士林 撰

復志賦

哉黃靈之淑胤兮旗所履而為姓
越奚仲之有國兮誕繩繩於車
正逮長滕於宗周兮歷萬祀其猶
競座以言而發身兮鄙以力而稱
聖紛支屬於五方兮既班班乎
家乘亶會稽之句章兮聿御史而
有聞迭世祚其顯昧

兮覃斗海之有孫眇陞州之一曲兮羌幽樂於白雲抱
曷鼻之倥偬兮戴圩頂之鬢髻辟長風於萬里兮信散
木之擁腫窮恫鄉之鬻卷兮矐余目於蹇淺招庚癸於
首山兮想飢渴之不免孰知夫倡麴窮之大呼兮勤茅
經於叔展雨絕灑於碧虛兮空回戀於有渰木掩靚於
春陽兮佩秋風之未慘忻吾車之未駕兮謝直矢之多
岐抱素絲之不染兮紛黑白其何為軻者丹之竒餌兮
不如魯勾踐之良規大良造之適鞅兮不如退受安人

之罵辭秦憎憎乎嫂妹之詢忍兮痛修辭於殉市之尸
非濬濬乎子瑕之愛憎兮迺懼夫姚賈與李斯喘債軍
之株坐兮悟不死廁中之更溺惜女子之見賣兮悔不
忍胯下之年少讓不思國士之揃拂兮又何致必斬趙
衣而讐報亥不激屠門之亂曲兮又何致必椎晉鄙而
危蹈心固不可溺於所涉兮智固不可售於所市身固
不可試於綢繆與睚眦兮足固不可失於流行與坎止
感耦耕之招攜兮何滔滔而不能守孔約而罔貳兮憚

異羽之人犧不察察於薇粟之重輕兮亮溝壑之有命
不悶悶於蕭艾之糾結兮付江濱之行詠信皎皎其何
之兮聊默默以隱情卒餘懷之業兀兮庶察者之見徵
道悠長而日邁兮罔思謝之足懲尚壽考之膺彭兮安
知來哲之無情

遊越天門賦

柔兆之春二月既望任子與客泛舟遊於天門之表于
時颺母停颺慎郎捲霽飛滂不興淡漫無際始則拖長

綃偃悅腹徘徊蚌蛤之洲睥睨鼃鼉之國少則掣掣洩洩
洩汎汎悠悠飄如雲逝蕩若漚浮浩不知蓬萊弱水之
在眸也浮余觀於漢裔渺一世之蕤苴有石塘萬里鱗
鱗然隱波濤之下此殆祖龍氏之所鞭乎何其神也靈
洲瞥來絕島遙沒隆隆隱隱過大業天子之祠焉見其
君臣黼冕將帥鼓旗儼然牙樞錦纜銜尾而維也又何
其竒也昉二帝之所規悼生民之不幸身未死而變隨
顧英雄其何往於是停橈而思思窮而愁作噫嘻悲夫

客亦知夫天地之數廢興無常而孰知其網罟不必擅
觸之強荆不必暢九之亡江上之寂寂又安知非人世
之揚揚客遂鼓柁而歌歌曰擊蘭棹兮扣桂舷訪田氏
兮弔仲連數術不可久御兮驚力不可謂賢然乎然哉
吾烏計吾身之久遭余迺敲脚唱小海以和之客復擊
節順流而歸不知舟中之有明月也

閔已賦

并序

正月八日獨坐雷公山中天寒風緊抱書自憐漸老醜

之逼人慨盛時之不再匪私駢角恐墜肩墻作閔已賦
庶幾成此志耳其詞曰肆后皇之嘉貺具藐然之一身
戴玄髮於芳鬢含纖齒於龐唇匪肖貌之我私獨降質
之爾淳有賦予之重責尚墜緒之大振張余挾於幼眇
自青襦而裹巾亦淳濯於羣汚窺末光於德隣孔孟吾
之師不可以復夢兮為誰門之人顏賜吾之友不可以
遽作焉為誰居之羣倚泰山而長嘯俯黃河而孤嘶瞻
飛雲於月下訪流水於回堤謂雲行而月跋兮亦升東

而沉西謂水逝而堤在兮怒高岸之為谿理不可以逆
曉事不可以深稽去者非人之所推陷者非人之所擠
來者不可以徑遏降者不可以驟躋眇余思之茫茫隱
余神之淒淒匪飢寒之足慮匪患難之足疑恫大志之
未立矧絕學之無依人不能憂余之憂兮余亦不能悲
人之悲聊紙筆以自係走四方而陳辭庶聖道之未沫
將援余之孤危

感雉鳴賦

余歸山之明日甲子日斜有鳥有鳥鳴于竹西楨搥綺
翼紺趾雕題余睨而視之曰此殆丹鳳之儔耶嗟乎山
梁之雉也亦何為爾栖栖者歟鳴聲益和如語以臆曰
承后皇之嘉惠胚太和於卵翼攬草木之清麗濯雲烟
之絢碧被文繡於外體抽肺肝之五色將自拔於羣飛
羌好修而強飾吁嗟乎余身之章兮又安知非余身之
賊祝網密而羣空虞機張而羽積林無全殼野絕胎息觸
霄星之紛然聊擇音於彼木濯余羽兮清泉充余枵兮

棟實固將坐錦衣於泥塗破黼藻於荆棘者歟悲夫太
上貴質其次有文文而好自用斯為下矣猩血染而管
泣象齒幾而身靡鷹能搏而困軒楹馬能馳而厄鞭箠
龜以筮焦翦以毛死是故君子不失足於人而黃中通
理也弔正平之鸚鵡悼賈傅之飛鵬訪稽氏之昂鶴睇
楊家之舐犢拜自獻者何心祇腥臊子偃肉已矣乎春
山空兮春木頰春雨零兮春草肥天地為樊兮日月為
鞿優哉游哉兮飲渴食飢叩鐘鼓於魯饗謝簫韶於舜

儀彼霧中之玄隱固將有感於陶妃

翰音賦

若知雞乎錦衣繡翼孤唼我冠被鳳之彩插鶴之翰音
聲俊美容止輕鮮溯羽族之稠濁諒五德之獨全然而
沐浴泥沙步啄蟲豸曉樹棲早晚柵藏矮朱朱州州進
退失解夫豈慕鳳凰之戀匹仰鷹鷂而護雛不借力於
九萬遂扶搖之所圖鶯鳩搶榆烏鵲遶月甯咏非雄羽毛
未刷猶決起而驚飛吾何獨守此桀也爾則明河在天

曙色上戶一振聲於兩翮若怒飛而遠翫勢甚超凌力
則困阻氣亦飄揚身不能舉如長沙之誼蠶室之遷過
永之柳謫潮之韓匪志氣之不厲獨墜影於孤鶩既漆
我羽又砲我距謝雲霄之羽儀抱村落之風雨恫升躓
之有命匪軒沉之在人間爰居之蹭蹬亦避風乎魯門

蟠松賦

渺堪輿之神氣孕東海之平巒紛百昌之甲宅儼孤松
之結蟠根半蝕以秀出枝萬折而回環允神物之附靈

時矯首而盤桓瞰然鱗甲之四縱傑出頭角而噴翫霧
市暝合雲衣晝飛非鞭霆而欲駕則既雨而初歸爾則
童豎俛仰恍然劉累之馴擾風雨吟哦又似夫葉公解
衣盤礴雷電至而飈馳也噫嘻龍為物靈不離鱗甲蕩
日月撼山淵不崇朝而雨六合何其神也桎梏禹宮之
梁斲削雷澤之梭延平之劍津吏夜驚長房之竹騰波
自駕象罔求而不得雲霧集而時化又何其幻也而况
乎青髮君之盤踞秦大夫之春容妙蜿蜒於氣母抱不

化之神蹤龍不知其為松松不知其為龍人不承澤螻
蟻為宮龍乎松乎出冢間之雷車走隴上之雨工松乎
龍乎撫亭曲以一嘯山四立而長風

鳳花賦

若知鶴林之神乎霜月如銀西風砭人丹艷自春何以
羽翼賁此坡壠爛然九苞蹲為孤鳳百鳥無聲精采欲
動吾聞蜀山之魄下故墟而啼寃灑丹血以成葩幻七
七之妖仙迓羽族之初服宛來儀之踟躕出不化之神

為帝為鵲為花為人而復幻丹穴之形有不可致詰於
洪鈞難憚犧而斷尾竊有雛而拔羽機心洞人網目如
雨將色舉於朝陽甘草木以同腐者乎噫嘻良嶽之植
政和之網輦而致之汴水湯湯一鷗不發摧折無光天
子曰吁謫歸故鄉抱別而旋東風重芳蓋天津之聲舌
既饒矣使一見賞幸則華林之觀銅雀之二喬矣其不
為強項供奉之所笑者幾希安在德輝而下之立翠微
之晚月伴棟樹之後風萬卉欲寂空山自紅太牢鐘鼓

而不忍紅裙擅板而不驚蒼梧楚楚翠竹亭亭清風徐
來求凰欲鳴渺不知花之精鳳之靈吾亦蝶我之俱化
歌樊詩之商聲

賓月堂賦

并序

永嘉葉伯幾士林識之西湖之上清風襲人真畏友也
未幾遂為吾州師出其翁賓月堂圖俾賦之翁既分教
江西遠在千里猶覲面也其辭曰南鴈主人既堂成之
夕天宇清新玉露橫陳若有人兮駕言徂東徘徊斗牛

歌舊雨之不來嘆浮雲之於我將有謁於主人之堂於
是蜚廉揖至大夫掃門初猶讓登顏色未分久乃拾級
流光若奔主人方坐堂上仰見玉人顧而樂之罷琴與
書相揖入帷作而曰靜而清默而明不將不迎應物無
形此佳賓也吾嘗過子逝川之上不沉不浮與時俱流
又嘗覲子東山之巔不磷不緇清風自怡子不我賓而
賓于誰今夕何夕寧不我規賓亦從容不覺前席若有言
曰吾聞皎皎者易汙盈盈者易虧潛雖伏孔之昭明吾

誠也食而見更而仰過吾資也是故大白若辱恩陰滓
之或來也大盈若冲信滿盛之必移也吾知吾情而已
又焉以規子為主人起謝入而謀諸婦洗觥具杓與賓
相屬主人起飲賓不語主人趣舞賓不偃對影成三賓
不去於是歌太白之詩屬坡仙之句鶴鴒更寒天河東
注主人既醉而寐賓去不顧

吉祥賦

有序

吉祥草酷似蘭而疎秀異之海國有其種率云十歲一

花然鮮有見者余過僧智傳之室見一本紫莖而花花
莖纔二寸綴花數十似瑞香而微小近玩之有香氣傳
且謂余曰種且十五年矣今纔一開感係之餘賦以自
廣矇靈姿之幽絕蔓天竺之化城挺纖疎之奇植負吉
祥之嘉名孰北滋於下上亶見擢於衲僧方其根移露
本益壅春膏儼紫莖之呈瑞伉蘭蕙於亭臯然而朝培
夕溉十有五朞春風秋露日以披滋卒深韜而重發何
堅忍而舒遲諒得天之獨厚不驟悅於時宜候半世之

力深迺舒英而揚奇噫嘻江路微暖野梅漏枝駘蕩未
透宮揚既絲木俟夏而蒙綠葉迎秋而飄飛含英之本
麗土之枝孰不聽造兒之鼓舞候氣母之推移肯耐靜
於寒暑不跂榮於槁萎噫嘻甯越之學請三十年文公
之伯十九載而迤邐彼長沙之誼乏寧志於初歲玉樓
之賀無靜心於早慧一發洩而輒衰萬不成而敗繼余
嘗感人事於河清之期悟城非於鶴歸之世三竊桃而
人未知年屢變海而悵其東逝嘗美草之感余起余衷

之繆計尚深根以需榮倘來時之未艾諒就木之嘆婦
又安能訪此花之開閉

老婆牙賦

并序

東海有物曰老婆牙疥癬醜石搯之得膏是可怪已墮
州任子為之賦曰何氣母之形幻縱造兒之經紆探川
后之珍錯得老婆之蛻牙既齶齶而齶齶亦齶齶而齶
齶乍斷槽於庠竹終齶笑於浪花漱嚙乎春潮呀呬乎
寒沙如懷英之石露處之峰或稜層而墻壁或異宅而

殊封者乎于時菜鮓逗香葛禪無句奪木頭之叢耳撥
江上之破布忽真牙之鑿余尚流涎之煦煦登徒齧脣
之妻於是朶頤王川赤脚之婢遂為之掩口又况青女
弄嬌王妃試手風姨窺軒月姊呈牖堆案上之黃妳窈
窕中之酒母傾礮碣於寒釜堆疥疔於古缶目掄齒決
搥敲石掊得金膏於沙礫吸王液於痊朽燕不償勞爭
取恐後噫嘻悲夫舜華之妹瓠犀鮮鮮素質化已遺蠶
豁然輔已脫而車在唇既亡而不寒豈舌柔之易毀而

齒剛之反全諒堂下之乳婦宜對此而躡躑

水仙花賦

眇伊人之蟬蛻兮宅清冷以為扉越蓬隔弱窻不知其
幾千里兮跂余望之忽軒窓之翠簷分見此綽約之芳
姿曳青葱之華裾兮倚玉薤之披披逍遙清霜之夕徘徊
明月之辰佩乞碧霞衣紉綠雲金杯盃雨玉盤承津
料和注淳斟酌天均于時庭空人靜萬竅不作聲沉步
虛之歌奏杳鈞天之樂江妃具俎以進羞海若充賓而

酌酢持杜觶而未揚想堂中之歡樂予亦洗盞更酌接
芳蕤而為客縱歌頽然不知天河之既落

庭椿賦

燕山之陽南溟之濱有大木焉其名曰椿蓋抗歲時而
聳立揭造化之蹲踞者歟相彼竒亭夷庚掌平迺瞻箕
村覺椽列星維陋巷之蕭蕭兀幽人之柴扃有椿喬然
闕乎中庭玄雲構其堂宇秀色結乎軒楹觀其崇根碩
本挺柯稠葉翁翁焉尊尊焉青冥黯黯皮溜雨而胼胝

幹拂霓而冗選，簪日月之氛陰，控雪霜之飄颻，千尋引而表端，萬鳥棲而影接，蓋根抵之臃腫性也，豈不美乎？莊生之櫟，枝葉之滎暢時也，又何歆乎？王氏之槐，耶訪歲寒之松柏，盼老人之豫章，或輪囷以為竒，或偃蹇以為傑，孰與夫却匠石而斲，弗謝萬牛而崔嵬者乎？爾則稚竹株連，弱松肺附，結緒根於地軸，藉末濡於雨露，想其族幹，泮泮列萬間之厦屋，不足以喻宗條，鱗鱗雖千社之粉榆，又何足以同年而語耶？於是天翊其貞，地隆

其植寒暑節其涼溫鬼神呵其峻特醴泉夜注而人不能挹以草木之滋鄉雲晨覆而人不能衣以青黃朱綠之絲人不足以扶持而終風不移人不足以悅懌而陽春色怡此所以俯視君遷傲睨平仲而永為斯庭之瞻依也耶彼尋常之橋梓亦何足以與乎斯

石假山賦

天地之間境足以移人人移之而飄忽物足以致人人或可以致物此操蛇之神所以對愚公而斲甌也抱燃犀之餘燠覽其區

於一日黠波臣之晝泣開水府之羣玉媧煉之遺禹餘
之斲隕而星芒結而水沫耽枯影之申徒聚黃鉞之
沉璧何其竒也爾則鐵繩十尋魚貫萬夫水厭人而
不悔鞭有血兮疾驅蹲者踞者立者蹶者銛者剗者
獨者附者似鼻似口似蹄似股似螭而虬似鬪而虎
雲幻狀兮孤凝鳥停思兮欲翥神剗鬼削鬪面呈跌
出濠濮於華林納乾坤於一壺九華曉立五老前揖
坂賜履之登躋養瞳神於萃兀誰歟抱琴徙倚而吟

樂山之樂萬古山心草華木滋挹其仁也霞吞霧叶
擊其神也厚載靜容德我則也霏翠排青色我覲也
真趣已亡枯立堂堂子胡樂之以偽翼狂主人曰嘻不
毛之珍天不怪取終日之介置我丹府誓言不移容揖
而去

不礙雲山堂賦

他日太學陳博士為余言大夫陳次賈之賢會其子自
錄教事於鄞及交之嘗曰不礙雲山堂先人南墅翁之

所築也今更深密存先扁大憇先志之不白子其賦之
其詞曰紛吾車而夙駕渺九軌其何之歲冉冉而不留
况秋露之夕滋弭節蒼梧之野醜酒峴山之碑羌往迹
之莫余追也靈龜許予以啟行江妃要我以既渡權子
舟而五覆駕陽侯之初怒洄不可以徑溯也於是晞雷
峰賤石唐領跨五花巖跪羣羊心夢夢其如醒散清颺
於流矚訊厥考之初構市紛來而擊穀神默默以昇子
閱歲年而抱獨爾則雞犬桃源父老秦服石屋無扉蔭

雲覆足朝雪溪兮濯襟夕晞髮兮溪之涔抽玄鑰兮參
同餐神氣兮丹林囿羣山兮雙門悵白雲兮南墅傲萬
物之虛舟獨翱翔乎天府嗟夫雲山之竒造物所吞訪
雷澤之平蕪恫專車之後觀弔衣冠於江左之年問風
流於王謝之舊想其尺烟寸雲貿貿然紅裙蠟屐之所
到人不得擅而有也雖欲分樵斧之夕陽占漁郎之明
月慮有德色矣斷林火青顏垣雨黑睇猿鶴其何人載
英風於上國爾乃意行莊舄之吟足重下車之揖心舒

體快口靜神逸向之幽姿絕觀屈辱於牙籌金埒之家
者得不獻笑而迎排青而立也於是撫其圖而為之辭
曰山之南兮有堂漱丹井兮伯陽菊之潭兮可觴溪之
雪兮可湘是為羣山之圃兮以翔弔先友兮落星食舊
德兮炊香豈為其兮田荒筆耒兮兒壻歲將暮兮無梁
豈無人兮康莊

瑞粟賦

翔鳳蔣東莨家刈粟長沙塘之上得一莖七穗焉東海

任士林聞而賦之曰長塘之陽維粟穰穰匪駢匪枝七
穗一莖匪雨露之私匪神氣之成維君子之滅天揭之
祥牝牡異宇卉藥間芳豈不偶見妖人之狂拱桑理木
岐麥穎禾世衍時成瑞出則訖今茲歟乏民蝕吏苛七
穠在壠賁山坡阨悝盡地力晦益三斗穗不七兮民害
以厚錯實塞下日輸百萬穗不七兮民竭飛輓蔣君之
仁充然畝畝和以後兄孝以奉母日服其罇地亦發漏
百里牛肥仲尼羊茁視粟知人田父孔悅何以繪之維

此有象誰與紀之竹林壤壤

寶麓賦

成宗皇帝臨御之明年陞奉化縣為奉化州於是始興
復文公書院於寶麓之陽既成假祠吏任士林賦以落
之其詞曰紛萬山而越行兮氣蜿蜒以冲融東赴海而
將窮兮勢糾結以益隆又折鄞而東行兮有開元之故
封出雲南之廿里兮摘青櫺於秋風斲華頂之右股兮
乃益崇其西墉叱太白其逆走兮柱南山而膺空下廣

衍兮為疇為丘中疏瀹兮為洄為流忽寶麓其隆起兮
實枕雄乎一州喧阗於釋子之鐘鼓兮屈辱於牧豎之
蓑笠又不知白雲蒼狗幾變幻兮而春忽秋也木偃蹇
其獨卧兮而秦封之不受固將叩其據於混沌也花摧
折其特芳兮而移根天上之年瞭乎其猶可問也於是
訪昔人之所廬兮得嘉宛之故址察鳶魚之上下兮收
端倪於天地迺難蓬翟迺斷松梓棟突兀其凌雲兮門
洞開而出日水抱曲而吞江兮玉橫陳而架筆羌紫陽

之舊祀兮有白鹿之初馴瞻申申之燕居兮立青青之
彥俊以游以息以講以習時風乎其詠舞兮曰微吾其
誰歸日彌高其鑽仰兮亶卓乎其如立噫道不擇地而
存兮地不擇勝而尊蹈廣大兮精微之用著宅高明兮
中庸之體具鄙從事於斯文兮其有考於廢興之故

燈花賦

夫何清夜之炳炳兮吐丹艷之灼灼日抱烏而行空兮
月樹桂而流魄矧膏火之自煎兮乃含華而舒萼出坎

離之遘濟兮粲火棗於尺宅返汞神於九死兮忽金芽
之中拆曰惟人事之吉兮功或成神於龜焦主人曰吁
蒸成菌樂出虛呵骨祝瓦迎鵲避烏是固率天下而途
也物有儻來豈固以喜為示也事有妄意亦固以喜為
戲也羌不知其故也天地沕穆兮萬物以遷人志侘傺
兮日鑿其天工為商而智鴛兮接為構而心然精神外
薄兮物挹其先嗜欲將至兮兆扣其玄紛吾車而交誘
兮固鬼神之所玩焉莘女入兮昌出囚越施進兮蠶具

舟姜醉遣兮戈逐羸侍巾兮夜挾輶贈予策兮魏課釋
予驂兮中流兆豈足以行矣機密庸其所投竿籬籬兮
車以載築登登兮象以求五羊百里一言千秋堂下醜
蔑旅中馬周允夢寐之不化燈有占兮何由至若角枕
粲兮夜泣守宮殷兮臂紗濕織室兮魏俘趙近家兮代
籍斬人祛兮諄謀射人釣兮縛釋將孰從而訊之抱驚
魂之初惕龜鼎香兮羔美朶我頤兮動吾指食既戒兮
皮冠何從酒在盛兮睨無褐之與同彼夢泣而且旦跋

或囊而履凶府潭潭而具刑兮壇轟轟而趨縛位上卿
而東市兮身四輔而仰藥九錫具兮神飛符美新兮魂
索呂肉赤兮霍骨白薄氏貴兮昭誅成毋尊兮王氏礫
祿如意兮豕人立玉樹歌兮擒虎迫諒兆吉於未然亦
是花之所蘂鄂韡韡兮誰欣終不減兮誰虐嘆夫憂樂
同域兮吉凶迭馳利害焚槐兮是非守機喜不足以德
色兮戚不足以留眉天不可以逆計兮道不可以預推
適來時兮適去順宜悲欣兮目一瞬驅五步而却止兮

有千里之陰，刺抱牆角之短檠。兮聊以對白頭之繁燼。

蚯蚓賦

大塊噫氣，人籟比竹。而善鳴者，則有羣物以旁以注。以
宵以臆，以脰以翼。類不足而足也。彼却行之微息，示上
德於帝。初進不吸風露之枝，退不登鼓吹之車。誤中斷
於斤斲，而蠕動之自如。壯聲之激發而止，作之誰歟。
時則綠雨圍陰，碧雲漏晴。江月流清，得意自鳴。人闔之而
復寂，夜中分而既停。何其異也。予不聽之以耳，而聽之以

心而聽之以氣也嗟夫夫人之聲生於所感感生所遇
耳目心志其具也喜怒哀樂其樞也故發若機括振若
金石感之者形開入之者心趨是以飯牛虞虜九歌五
噫安知非弱喪而不知歸者耶彼且委形於天委和於
壤聊以呻吟其天倪不足保人間之俯仰童子曰吁含
化以濡不如抱枯含聲以呶不如冬結彼固妄鳴之子
亦妄聽之矣

松鄉集卷六

欽定四庫全書

松鄉集卷七

元 任士林 撰

書太常卿孫靜見文集後

右孫太常詩文若干卷其子凝出以示任士林將授之
梓以行世也某嘗讀庸齋趙公所作夫子衢州家廟記
知公治郡日為政固有本也况徐徑畷為之民梁子奇
為之客實踐力行之學所以施諸民事而措諸文辭者

者宜有徵也至於凡立朝凡持節迨為京大尹殿陛之
吁咈廟堂之可否與夫當世儒先生之往復辯論下至
郡諸生日誦說鑿鑿然理本之言豈操觚弄翰者所能
窺也尚惟舊史散亡新聞未有攸繼吾於前修筆墨之
遺宜可服而習之則其行遠也固宜遂書以還孫氏

跋史文靖公遺黃司戶襄閩書後

史文靖公所遺黃參軍真文忠公之徒也語其才力宜
非永國所棄第失其名字不知終身所到嘗備中朝之

用在當時所疏否抑不知驅馳幕府之間如近世謝疊山所追惜否起公論於百年之後此帖不無感云

題劉忠公諫草後

清議有益於人之國乎世無忠公一疏則父子之道幾絕壯矣哉然淮蔡功成舊恥亦雪袞衣初歸處置未定而其人竟失終身之節天乎吾固惜其材之未盡施而忠公之氣則已伸矣

書大魁宮講方公墓銘後

往時士大夫之對在廷輒得正人起公論於異世庸有
賴也余感泣久已友人方叔敏出其先宮講公墓誌銘
且示甲子發策懇懇除舊布新之事當時以為不祥卒
一校書郎以歿惜哉彼選居其亞而寵數起凌卒為歇
後鄭五僅免為亡國之辱亦何補哉然公唱第日慨念
其父南安府君名在甲科不出七人之列孤能不以首
選為驚乎故九賓一呼而涕泗交下自闕廷至期集鞭
絲帽影終為之不憚是固不樂於達以越我先人夫亦

甘於斥者歟此銘筆之遺者俾刻之碑陰云

考亭先生聚星屏後題

天地之精鍾而為人賢者其秀也故其精神流布上著於天星象不能隱其德傳說之傳不可誣也今夫使入蜀客近帝列雲臺墮營中中台少微出處生沒信而有微則夫陳荀氏太史之奏固未可辨其為誣也然嘗觀太史公天官書景星者德星也其狀無常出於有道之國劉氏季世金火罰星揚光天廷俱入房心襄楷憂之

矣漢事為可知也潁川入房一度胡寧而有德星之徵
乎二翁德瑞世二難八龍賢足以挽漢之回天象固為
不誣而漢事終可知也則二嬰抱車中坐膝前玉雪可
念固豈為曹氏出乎人心誰獨無漢也非曹氏則不足
以大託吾民二子材略亦非曹氏不用二子豈忘漢者
哉世事固至此也吾觀二翁德宇恢大非沾激取福者
比教行乎二難八龍未有過舉雖二子有不掩衰世之
質固亦人材之傑太史氏知星乎哉碣曹士開氏其先

蔡太丘歲時過墟里夢寐名德未瘳也行聞越間得子
朱子所命市工考亭陳氏聚星屏畫初本後有答鞏仲
至布置未安語好古好其人好畫好其意云

書方師魯文藁後

余少時喜作陳思王小賦自謂文潛輩相頡頏然終不
能進矣至若子雲相如之作則矯首歎然莽不能窺材
力正不侔也讀師魯瀑布賦鎔意鑄辭浸淫乎二子亦
竒矣余甚愧之迨其詩若文則汪洋演迤平波千尺時

金匱要略卷之三
卷七
有蜃鱉之駭使人神悚目移向若不進終亦獲其恬霽
也蓋師魯上郡計時有翁校書公方擢大廷第一親聞
理本之言亦浸深矣

題劉竹居四覺窻詩後

世人生死夢覺中而不察也故達人以百年為一覺上
虞劉君竹居題寢坐之室曰四覺窻謂一日之間夢即
覺覺即夢夢亦復覺覺亦復夢如是而吾事畢矣然翁
履人世今九十年矣凡幾夢覺耶不知所夢何適所覺

何喻也翁笑不言且食蛤蜊

跋黃秋畦自書墓誌後

老畦翁閱世熟矣獨死事未有所屬手為誌文以遺其
子介亦達矣然東坡嘗追誚劉伯倫以為未忘骸者翁
亦當一笑云

跋中不倚所藏吳傅朋帖

王逢原遺腹女是生吳傅朋書法固有自來此帖往復
殆小乘僧之流非高蹈大方者也不倚文字外人乃能

寶之於百五十年之後豈徒玩其筆墨之精世之人以殺為戲以業為果觀傅明此帖非榮之良砥歟

書蔣定叔詩卷後

金虎呼泉科舉事廢耳目明達之士往往以詩自暢然有詩法有句法有字法森嚴玄邃未易入也定叔白首呻吟發情止義其有得於詩法句法字法者乎不然則山之選何居定叔嘗次先人詩一握美家林今其子復能次定叔之詩獻聞當世抑亦不匱之孝詩云乎哉

書唐人集句後

活剝張昌齡生吞郭正一昔人所譏也自王介甫石曼卿始集古人句為戲孔毅父遂刻意為之蘇子瞻已不恕矣近世百家衣盛出能不無天吳與紫鳳顛倒在祖禍之失耶某氏子新意如研久事游歷使能原性情之感知禮義之所止儒先生當避閱閱如搜掠未窮鼓不足而諷席雖李商隱之祭魚楊文公之衲被祇見其勞而發亦止耳名山大川清氣未歇其必有以語之者

試挾此以行

羅國賓竹西卷後題

竹於秋為最宜其萌其篁其操凌雪霜而不屈竹之致固不一也今夫金風有聲玉露垂液而竹瀝然視萬物變化殊無隕穫之色至凌雪霜而不屈勁而充其操者也臨安羅君明經家也視萬物時有秋事植竹西塢以觀其灑然者勁然暮色蒼然爽氣在袖作而曰鄭生不去吾道東乎

文華國如此山二師詩卷後題

二師吾鄉佳士也求諸冠巾而不得乃於吳越山水間見之筆下時有食肉風味使二師不脫冠巾汗漫江海日挾毛錐子自食且傷屯悼屈之不暇安得有此清鍊耶

洪崖先生圖

謂洪崖是耶三十年却走人間世寧有是耶謂洪崖非耶漢宮唐殿行其庭者誰耶或是或否或見或不見乃

所以為洪崖也

戲書竹蕙圖

竹有君子之節蕙有士大夫之氣抑丈夫也君子人與
三十八代天師廣微真人小像贊

天人之師留侯之孫實惟先封其慶有源乃進上公錫
賚東還吳山莅止玉佩珊珊公顏怡止公心夷止永懷
天寵不驚以喜維教之門維道之宅式瞻清風光我林

壑

西湖遊約

結方外友同作勝遊真箇中人允為好事况千里相逢
誠非草草百年一息去者滔滔登山臨水或嘯或歌抱
琴與書徐行徐坐人耳人耳時哉時哉竹林之勝不數
牙籌蘭亭之集肯同金谷江上清風山間明月不亦說
乎不亦樂乎水中鹽味色裏膠青必有以也必有與也
善畫者圖形其有賦詩者隨意不拘

題方白雲山疏譜

梁肉之味不達於山林蔬蕨之甘不登於朝市地勢則
然也然梁肉厚味固有以螫其子孫而蔬蕨清風千載
有餘甘彼夷齊者獨何人也耶因書以還白雲方巨濟
入山蔬譜云

陪杜南谷踏雪上白石洞天賦反招仙辭

青山兮如龕白石兮如簾誰陟之兮有佩珊珊曰惟計
大夫之登乘兮有籌此探太極翁之上謁兮有丹此函
方一策而成伯兮履六甲而叩巫咸九還之在鼎兮玉

女浴而丁公惜去之二千年兮葛藟覃覃有真人兮目
眈眈乘飈車兮罷朝參鞭鸞鳳兮行江南斲雲僭兮裁
雲縑研元始兮跡盤古箋谷神兮說青驂嗟哉世之人
方累丸兮胡為乎不惴惴而沾沾履固不可以察察而
汶汶兮言固不可以炎炎而磨磨顧何樂乎凌溝澗而
渾渾兮蘄自墮於天鉗歸來歸來誠不可以久沐兮胡
不汲汲河漢而凌雲嵐嗟哉爾山之人兮吾不汝乎云

嬾

壽岩

人莫不欲久其所愛亦莫不欲尊其所知惟知與愛者之心亦惟其善之歸而已王氏為善且三十年與之交者知其真受其施者愛之厚德慕生於感激譽道起於衷私宜切切然欲其久存於世而傑出於時也遂以壽岩易其名使慕善者稱焉賦偈如左

福地

福地七十二在天地四方惟功成行滿者居之此神仙

者流之說也然而由人境求福地雖知者有不知語福地在人境雖愚者有不信固非囿於形者之蔽乎夫人以至善之身履至實之地行義侔神明語嘿叶金石休休其祥熙熙其和諸福之物與日俱來而不出庭戶之間鬱然洞府之邃名山大川日在人境中矣錢唐王氏某心有善根沃以素積視時廢舉每得羸於汎舟之役補陀老人實示之夢利往利來垂三十年於是所履益堅所持益厚而所施日益廣矣餐和蹈淳動與吉會足

金匱要略卷之三
卷七
無愆步心有寥天蓬萊方丈云乎哉方外之士咸以福地譽之必有得其用心云

題葉天師奉化鎮海圖

余居奉化始從父老聞其事既而與修縣志及錄遺其事今觀此圖若信有其事者天地間山川流峙其性也性也其道也一易其性則非道矣宜乎葉君之為神也

題吾子行瘞猫文後

子愛猫如愛人性馴善捕有人理也故封有丘凡有書

象有肖匪溺斯礫乎狗馬亡辭惟蓋至矣

松鄉集卷七

欽定四庫全書

松鄉集卷八

元 任士林 撰

題大滌洞天

世路迴欲絕仙風杳若遺
山餘秦漢跡石有晉唐詩
日月樓臺曉雲煙草木姿
藏書更何地白首付幽期

耐交吟

魚遊北海潮木偃南山坳
剖木木有漆煮魚魚有膠
二

金匱要略卷八
卷八
物幸相遇締固不可搖如何同心人不耐白首交

冬日

濛霧行冬曦玄春散臘樹江郊卧歲年風雨犯百慮出
門山斑斑下有鳥雙翥山深鳥翼寒啁啁啄中步

訪牟大卿

自開黃葉徑城郭有山林老夫相如璧貧嗟靖節琴青
天庭樹在白髮鏡塵深欲叩黃唐事寥寥千載心

寄陳宣慰帖

客從崑崙來遺我一寸膠投之東海中濁浪生青濤世
人飲涇水淪浹如寸醪醉久與俱化復惡醒者勞客笑
予亦休涇水方滔滔

鄞女墓

一卷書存禍未央湖西人老淚浪浪東風不與埋黃壤
孔雀屏深坐蔡郎

書族祖拓齋先生白頭吟卷後

少陵三賦明光宮清吟往往嗟不逢退之文章起八代

獨與東野相追從詩人肝脾有清氣語嘿正與時交通
我翁聲名四十載回首清廟埋黃鐘懸將萬斛扛鼎力
波瀾卷入呻吟中酒酣阮籍已類達瓶空靖節祇言窮
顧無一語道興仆自與大雅同汗隆諸孫習氣掃未盡
日有元白來郵筒更從帳下給驛卒一盃俛仰天夢夢

顧道士松巖圖

貞姿自孤特况乃生巖扃巖扃抱石乳貞姿懷茯苓所
以松間人獨誦黃庭經青雲傲白石野潤含青冥使欲

托巾履何用腰紅鞵

屏居

壯志輪囷強未銷
屏居萬事飽塵勞
貧知渭竹真堪傳
老恨江梅不入騷
山谷樵歌聞日月
江湖漁計足風濤
妻孥燈後應相笑
頭上如今有二毛

題外弟唐楠扇

南北阮郎俱白髮
東西施子共春風
人生得意何所羨
博後神叢亦漫同

海扇

海中有甲物如扇文如瓦
屋三月三日潮盡乃出

漢宮佳人班婕妤好香雲一篋秋風初網蟲蒼蒼恩自淺
猶抱明月為夷居至今生怕秋風面三月三日纔一見
對人搖動不如烹肯入五雲清暑殿

荒村布

荒村一機布辛苦朝至夕置之綺羅旁不入金粟尺持
歸語村婦投梭面不憚機手那可換明年漚麻白

次韻吾子行新年

有道貧方樂無營坐亦深
新詩知病後老鬢覺年侵
信有乾坤力時勞江海心
文園亦消渴渾愧白頭吟
已分身將隱還驚老易過
時來慰岑寂相與惜蹉跎
白髮短猶櫛青銅暗欲磨
人生有如此我醉子當歌
雪後春風起天空江水來
新年渾作客多病孰憐才有
道身先老無人首屢回
承禎須不爽聞已掃丹臺

公子舞歌

明河在天不可躬我欲汲之成酒醪
維北有斗不可量

我欲挹之為酒觴人生豪誕有如此況有開筵柳公子
公子平生白苧袍酒酣起舞天為高大鵬長風九萬里
老鮫鱗甲秋江水坐中忽唱河西曲琵琶聲高裂寒玉
態濃海樹出鷓鴣意足霜枝下鸚鵡為君一洗免女目
衆賓自愛白宰酒情歡不用夫起壽長空更喚明月來
人影檀欒風滿袖

鳳求凰

鳳將將求其凰凰既遂辭母旁逐凰孔良不與母同翔

鳳心長海樹涼

用子行韻簡周景遠應奉

供奉平生酒中郎絕代書自便青瑣直未放碧山居輩
行人誰在行藏意自如絲綸須世掌曾識典墳初

投容齋徐大使

湖山出清夜靜攝萬井喧誰持白月行鬼物肝膽寒徘徊
徊弄明光孤照欲墮軒不眠坐成曉海濶蜃氣昏幽蘭
濯天秀玉立寄巖壑生同野草青老壓俗眼白豈無桃

李榮東風亦輕薄作書戒荃蓀深根付開落

送許君實同知之任鄉邦因簡于有卿知州

一出已十載江流只目前家鄉荒政日客路獨醒年
南郡碑錢遠東山屐蘚圓歸心隨使鷁漠漠海雲邊

道訪子昂舟出苕溪

吾道何迂濶舟行亦滯留客心當震澤詩卷出湖州
風急初歸鴈沙暝欲下鷗誰歌招隱曲白首若為酬

謝廣微真人假以自然處士之號

處士猶處子聲光畏人聞正如豹隱霧又似虬蟠雲
乾坤照孤耿草樹含幽薰虛名儻可乞何以娛斯文

客遊華亭訪衛山齋

東浙青山少西湖白髮新漸多江海伴更卜水雲隣
楊柳初籠雨薰葭欲剩春不愁成汗漫天有閒身

老缺無魚久孤亭有鶴來聲名為客累懷抱向人開
白雪仍巴曲黃金自隗臺一年春又半搔首鴈空回

劉將軍射虎行

半濕新蹄山徑曉於菟夜渡海中島百夫鼓譟屋瓦震
將軍彎弓白日皎地形平露草不長狂嘯無風威欲倒
玄翎一中洞心曾坐據木牀脫鬚爪胃中白骨誰家魂
紅肉已供人醉飽人生意氣不下堂車鐸當當馮婦老

曉發衡山訪子昂學士

山林真學士天地一詩翁乘興不可返孤舟雪後風浩
蕩襟期別艱難道術窮何當真卜宅共老水精宮

送鄧善之修撰王眉叟孫初心二提點同入京師

客上幽并道人瞻李郭舟天清北斗近水白御河流卿
月殊庭表文星禁掖秋相看多道氣同是泛瀛洲

留別沈介石尊師

我本遊山來竟坐三日雨洞深石頭滑對面成幽阻平
生韓退之衡雲故吞吐復恐北山移林慚掩虛戶人間
出處士造物正未許下山見塵霧回首天一柱

壽杜南谷席上得寒字

洞府人間見春風花底看新宮銘有草白石篆猶丹道

在人知往門深客遂歡會開唐貞觀莫惜海漚寒

送吳養浩編修入院

制作方期子編摩正得人重金須陸對良玉已庭陳逸
氣開塵閣清風起古淳騎驢當盛日猶見玉堂春

屢訪開元陳高士不值

我亦乾坤一腐儒杖藜時訪白雲居故人不入江海夢
道士恐驚世俗書蕭史鳳歸雲縹緲劉郎桃在雨扶疎
當年親見東風事楊柳絲絲二月餘

李唐春牧圖

春氣熏人未耕作江草青青牛齒白牛飢草細隨意嚼
老翁曲膝睡亦著蓬頭不記笠拋却午樹當風夢搖落
夢裏牛繩猶在握昨夜困頭牛食薄

明皇貴妃並馬圖

宮坐已無素盜却輦車不見婕妤辭夢回南內淒涼夜
幾度東風並馬馳

山平水遠圖

三峽波濤揭暮天九疑草樹泣晴煙人生住此空高險
幾夜秋風得穩眠

用韻酬陳渭叟林伯清

我本厭塵市志在棲幽清還聽客城雨深夜愁寒更山
中兩道士孤鐺煮雷鳴漱沫得清謠久却世上名何用
王子喬相從學長生

題赤松圖

安期一局石上碁臧穀兩兔松下石山中人在蓬萊宮

夜半飛丹九天赤山人曉攜白雲出袖中却帶金華還
朝廷有道海藥至金馬門外無青山

松鄉集卷八

欽定四庫全書

松鄉集卷九

元 任士林 撰

侍家君行雷公山中謁大父墓因和淵明韻

歲月不可恃四時如蕃休今日復何日父子同嬉遊雷
公山氣佳春水生溪流上有冥飛鴻下有忘機鷗杖屨
遍林谷徘徊依先丘樵牧賞我趣班荆為賓儔酒酣忽
高歌山空聲相酬昔者焦先廬似此深密不衣冠不足

金波四眉全書
卷九
惜陵谷非吾憂松根茯苓長便此居何求

和唐玉潜用友人韻見寄

獨憐鬢雪上蓬婆未得逢君鏡水波世上冬青高誼少
山中目錄好詩多白雲明月懷安石細雨斜風老志和
人事參商那有時勞相望意如何

冬青事
見別錄

四鴈圖

江北江南秋正驕孤飛萬里氣方豪平生慣有水霜翼
却笑東風燕雀高

滿腹秋風鬱未開一聲清唳九天回
人間兒女有癡夢
明月樓頭獨往來

孤味雙翎睡舌香蘆花水淺海雲黃
城頭未落三更月
夢入青天萬里長

兩翼清秋倦未翔北風喉舌水雲鄉
菰蒲萬頃食不盡
肯與羣鳧逐稻梁

春晚

春風吹紅殷散作綠樹雨繁華乍當軒
清影已滿戶晨

興散髮坐幽鳥對我語一笑江海深萬事天地古富貴
不可招貧賤那可拒誰能安其常黔婁有賢婦

和吾子行見寄韻

坐覺秋風老貧猶借屋居長年空竹素何地不蘧廬道
義時相慰行藏日可書人生有知己我亦出無車

送空菴焦禪師北上

有道身仍貴無言機亦空宗風當一代弟子已三公晞
沐青天外行藏白業中若為辭寵數回錫大江東

賦用拙齋

青山有神姿，白玉足清弄。高人息世鞅，田父好懷共。鼃生未上書，意氣不可控。柳子既一揮，乃欲託愁諷。簾蛛布晴網，野繭作春甕。物化固何如，勿語癡人夢。

答上虞友人

古樹隔江流，青山日夜浮。天清家自遠，月白地曾游。詩酒貧何益，功名老亦休。歸心雲不礙，東去又東頭。

湖山堂

樓臺影落空明外
鐘磬聲來紫翠中
白日一庭歌舞地
蕭蕭菰蔣已秋風

重游昇元歸寄陳道士

獨往有所適
重來興未窮
蒼雲山色外
晴日樹聲中
世亦思遐舉
吾方抱屨空
平生司馬約
回首起玄風

七夕客中

容易鄉心秋自生
紆餘老態日縱橫
無官漫賦五升糴
有婦難呼一石醒
露氣滿山高木落
秋聲入屋短檠明

薄田可買歸無計星漢年年浪影清

月下歌

月從東出西壁沉會照千古萬古之人心人心只有月
照破達人當之成酒淫卿不聞李太白蘇子瞻把酒頻
問月無月酒不斟月為抵愁之白玉酒為買笑之黃金
吾徒俛仰明月下月亦傲兀窺人深徑須推罌倒甕為
月盡一醉如何青天白眼放月還西岑狂歌他日作佳
事共道此樂今宵今

喜陳茂陽客歸

對坐頭俱白，愁來強欲歌。
出門知己少，遇事折肱多。
海氣低青嶂，年光暗綠莎。
不堪妻子笑，舌在欲如何。

上虞客中

黃葉空階曉，清齋白髮人。
于于風力緊，滴滴雨聲頻。
妻子千山眼，詩書一飯身。
人間有知己，垂老未相親。

北山錢令公墓

北山老樹寒生耳，三百年來閱城市。
馬嘶無跡土花香。

有客有客秋風裏當年玉節照人間
朱顏羞殺江南李
誰將金盃不歸來
忠孝子孫元不死
空堂白日坐衣冠
漢祖嘗祠魏公子

岳鄂王墓

忠魂比明月可死不可滅
空堂坐貂蟬荒塚埋碧血
當時劍花寒肝膽照北闕
君臣計已定一死何足雪
湖山翁仲青坐見氣消歇
欲語老胥心飛濤過吳越

寄襄貴丁明府

丁亥吾邑有瘦馬粥之賈校尉諸生講後必一來
對余長嘶如此者兩月其甥徐天麟歸奉承故云
小桂堂前手自栽未沉沙塌已生苔青山自笑不歸去
白馬相看時獨來涼月清宵誰與共好花晴日不須開
明年應度盧溝水早寄春風郭隗臺

登初陽臺

人生塵埃中白日送昏曉不上初陽臺百年空自老神
光散瑤天寶氣橫碧草想當丹成時飈車謁黃道丁公
骨已寒壬女跡亦掃獨有山下泉清甘散羣槁秋風灑

銅盤夜月照吳沼
陂竹不歸來
浩歌林影悄

垂老

垂老真無計
勞生自轉難
佩雲春不暖
羶雪夜能寒
身世鷗鷖杓
行藏首肯盤
東風有庭戶
梅不日追懽

過華亭留別吳山諸友

出處何時定
歸棲老尚遲
江山無倦客
天地有真知
竺嶺呼猿日
華亭聽鶴時
平生愛杯酒
到處付襟期

賦當塗靈鷲山月印池

金文四庫
卷九
池水無流時月明無定姿池空明月來上下光琉璃但
懼陰晴多相遇長參差吐哉會心人庶以坎自持

東隣

久不入城府幽棲奈懶何新知相敬少舊藁欲焚多風
雨蛙雙部江山月一梭東隣有朱阮樽酒且頻過

八月十五夜對月

客路惜年年中秋月自圓正憐兒女側不共弟兄前老
去一丘壑人生二頃田茲游諒何事清影未能眠

贈相者王月屋

布囊詩卷勝黃金
白紵烏紗碧眼深
自是清時少遺逸
不須物色到山林

地爐不鑄儻來錢
幾欲歸來著醉眠
白髮相看須一笑
人生富貴出長年

登餘杭綠野亭望吳興諸山懷子昂

乘舟出東郭
泛泛苔上溪
起登綠野亭
玉人片雲西
遙知水精宮
坐與天人稽
鷗波付浩蕩
未足成幽棲
沂流

金匱要略
卷九
竟欲往相與尋孤攜

題鏡石

靈靜本無點磨礮不記春青天孤月在白髮幾人新

題點齋

不言之默吾全吾身無言之默吾全吾真時行物生夫

子聖人

和杜元用見過韻

湖上新樓好相過不厭君年光吳地老客夢越江分聚

散無虛跡窮通有昔聞時遮西望眼冉冉見浮雲

攜家華亭

六月下扁舟人生入客游青山浮日遠白水際天流
老色先秋鴈初心有海鷗鹿門在何許吾道日悠悠

寄題終南山甘河遇仙宮

河水甘河水甘車鞞鞞春酣酣平生不識劉海蟾
解瓢一酌香醪甜此酌濫觴人屬饜七蓮東海天光涵行人
千年下終南臨河不飲空停驂河水甘河水甘

送延慶濟上人歸西

人世難為客，心空不待年。
坐深千衲在，道許一燈傳。
白日論詩地，青山住世緣。
高歌望吾子，我亦買歸船。

十二月初六日曉發松江

冬霧比春濃，舟行日未東。
可能辭物役，豈敢怨途窮。
清興乘江水，交情付曉風。
流年今白首，何日慰飄蓬。

送吳縣教之麗水任

城郭萬山中，扁舟載北風。
溪清芹更碧，地暖杏先紅。
忠

厚期多士源流接迺翁周郎有遺蹟吾道未終窮

九日詩寄明碧竹院

我豈人間客秋風託爾隣一聲清唳曉萬里壯遊身出處自有道棲遲未厭貧黃花漫情思清對未歸人

遊石棋盤醉歸分韻得邊字

并序

詩酒日廢人事數日故少疎之道士黃季勉出荷包中錢二索沽酒意行初過吳守道見菊花數本正復可人其翁出酌三行再過謝希賢盆花標致

殊倍於吳試朱砂杯亦三酌徑上石盤上看仙人
奕棋遺迹雖爛柯之客不來而橘中之樂如在也
歸坐溪西酒肉具矣為舉大白劇醉尚念吾徒兄
弟四海今鬱鬱山城間意氣相得徒此五六人如
膠漆相投勺合秤停乃事磨刷游以泄其趣酒以
陶其真詩以出其蘊豈獨高陽徒乎分杏樹壇邊
漁父韻

一鴈不度海銜蘆列青天孤流怯走壑遠赴百道泉結

交貴日廣不廣空壯年搏沙固易散投漆固易堅所以
日共飲山花列秋筵道士黃石孫亦解供酒錢初遊濮
陽家再醉康樂前却看仙人棋危石如平田山風子聲
寂洞日瓢影懸歸來忽自笑我豈非謫仙更喚酒杯人
健倒東籬邊摸索溪石白莫嗔我欲眠

送徐春野

并序

往年徐春野來綜吾州吏事朔風裘馬意氣倬甚
今紫髯飛雪告父兄以去人貧以仕君仕而貧吾

不知人事竟何如也其所游松鄉任某歌以送之

昨日之酒月滿樓今日之酒月滿舟三十度月月圓缺
共君看月丹山頭君攜月色錢唐去我有濁酒誰為酬
功名一紙正復爾歲月兩鬢歸來休柳橋久負秋夜笛
花鬢老憶春風喉鵬雲正高眼歷歷鯤海未運天悠悠
雄雞一聲騎當發男兒頂上簪公侯

四禽言

大母偷小母偷翁落田兒牧牛不併力令人憂但願年

年麥豐熟大母細母偷亦足

行不得哥哥未曙登程日已蹉腹飢足趼可奈何前山
雨暗豺虎多

提壺提壺為君酤杏花村下誰家壚概平幟高有惡犬
戒寧不沽歸來乎

脫袴脫袴破碎一針無補處誰持篋中新換我身上故
但得深閨有孟光年年袴破亦不惡

題翰墨十八輩封爵圖

翰墨十八輩皆几案間不可闕一之物上標封爵
下圖其形旁書贊語殊有史臣之體余觀之不去
手畫筆精妍疑亦島外人所製詩題其左

公子裝車從楚國十九人行一不足上階卒賴毛先生
招手相呼公錄錄遙來翰墨十八人一日受封列華屋
世上空成孺子名論功却笑中書禿人生慎勿為事先
乞留足矣張良獨

松鄉集卷九

原書魚尾下卷次訛誤

欽定四庫全書

松鄉集卷十

元 任士林 撰

石刻天台瀑布寺謝表

雲漢用章來九天之丹詔林泉改色開一道之銀河萍
水交歡雨花散瑞中謝茲蓋欽遇皇帝陛下心行四海

德會一元風雨霜露無非至仁妙化機於不息山川鬼
神各有寧宇肆佛教之重興大轉法輪載弘誦席臣僧

敢不廣延釋子仰報聖恩衍智者天台之宗式克用勸
賦興公瀑布之句永矢弗諼庸妙談於九旬仰祈年於
萬億臣僧無任

省府祈晴意旨

日者衆陽之宗照臨在下民為有國之本種藝維時俯
瀝輿情仰祈大造伏念某等誤膺朝命濫倚省垣國賦
有程豈徵催之能免官刑惟恤或詳讞之未精不稼不
穡而胡取禾其身其家而不知本遂成積累乃遘灾屯

顧惟江浙之間田最早而水易溢迺當夏暑之日雨不止而民重咨麥已熟而不收秧既老而莫種失此及時之役曷為卒歲之供心則凜然民之瘼矣敬闡祈禳之典以求開霽之恩伏願雲漢昭回乾坤清穆寅賓寅饑御無曠於義和自明白威治聿歌於堯舜

省府祈晴青詞

大明生於東惟無私照百穀麗乎土乃亦有秋俯瀝輿情仰祈穹聽伏念某等誤膺朝命濫倚省垣治民事神

之間能無所愧修身齊家之道固底于行適當夏暑之時未遂田功之本弗種胡獲有欲必從敬求開霽之恩以請生靈之命伏願乾坤清穆雲漢昭回昊天曰明宜舒長於化日烝民乃粒式歌詠於豐年

呂道錄保安醮疏意

皇穹降監嘗控忱辭萬里還家庸陳諾責叨榮已愧昭謝惟恭伏念臣幸囿儒風竊窺玄學粵自先師之入觀獲侍後塵乃蒙教主之見知俾陪清列近由北上迄乃

東還念山川道路之阻修何恃而往矧寒暑陰陽之變
化惟疾之憂壹是控祈兩全出處敬潔精純之薦仰酬
覆載之恩伏願上帝垂仁高真錫祉儻身游鄉部粗安
清淨之規則目睇玄門少遂繼承之托

謝恩醮疏意

玄穹監在恭被疊書妙有庭深叨塵鄉部拊躬知懼稽
首加慚伏念臣少涉世機幸依道域委心冲寂豈曰淵
宗遇事迂疎未聞玄奧尚念先師之際會僅拜寵光敢

圖教主之矜存俾循往武惟教事有鄉鄰之舊而教門
煩規度之餘何以仰承未知淑後敬潔精純之薦用伸
昭謝之私伏願上帝垂慈衆真錫察常清常淨共瞻官
府之更新是繼是承式衍家山之甲乙

宗陽宮三清殿上梁文

玉京三境之居威顏如在天子萬年之壽景福有祈睞
惟宗陽之宮翼近省垣之地山川交慶棟宇一新載惟
杭州路道錄住持提點南谷真人生遇聖朝恩承先帝

理身如理物日深抱一之功事君如事天時謹祝釐之
奉越自鋒車之聘召薦被璽書之護持玄都之樹森入
垣墉滄海之波輦為基築於是輪奐極東南之美經營
來山嶽之竒畫棟朝飛開金闕寥陽之殿黍珠晝見儼
瓊林羽蓋之尊增八荒壽域之基侈四海太平之觀以
朝以夕以禱以祈自我聰自我明擬形容是之謂象在
其右在其左非壯麗無以重威爰舉修梁載陳善頌

拋梁東海月團團上碧空若木風清黃道直太平風物

萬方中

拋梁西瑶臺新月碧雲依閭闔春深王母宴九重孝友
壽天齊

拋梁南殿閣薰風入陛簾星極老人游象闕遙呼萬壽
華封三

拋梁北斗極天高星歷歷五雲深處紫微明炳炳前星
垂正色

拋梁上萬國熙熙瞻治象風時雨若太階平鑿井耕田

人擊壤

拋梁下百穀芄芄秋滿野人人鼓腹慶豐年草笠黃衣
通八蜡

伏願上梁之後玄風昭布道化流行皇矣上帝監觀四
方衍天下歸仁之治錫厥庶民斂時五福致臣子報上
之情

四聖延祥觀上梁文

乾坤拱北極之居威行四衛棟宇開天宗之勝福鎮一

方海岳騰歡神人交贊恭惟玄教大宗師上御真人身
為教父道際聖朝入承清問出侍屬車簡在九重之寵
下詣重玄下探無始妙凝三極之光儼然上界官府之
尊賁爾東壁圖書之序築宮廬而留侍錫崇真萬壽之
嘉名對湖山而坐馳領延祥四聖之珍宅自夜半有力
負山而走至堂上一言侵疆以歸千載之規其道復昌
十年之間何事不立今則紫垣突兀畫棟遙飛瞻天象
虛危之垣噦噦其冥噲噲其正當揚州牛斗之野赫赫

厥聲濯濯厥靈爰舉修梁載陳善頌

拋梁東一水天門映日紅祥風遠起蒼龍角草木蔥蘢
萬壑中

拋梁西天目山高碧漢齊畎畝秋風成萬寶玉於菟外
下苔溪

拋梁南一塔河西九曲參薰風朱鳥神霄止聲教煌煌
自朔覃

拋梁北一天星拱開璇極朔風高駕玄武尊萬里承恩

金匱要略
卷十
車軌直

拋梁上雲漢昭回著天象帥垣四列紫微高威德堂堂
民北嚮

拋梁下山嶽真形鎮民社時暘雨若地方饒治世歡聲
散田野

伏願上梁之後玄教靈長明威昭布遠揚聖化山川鬼
神亦莫不寧衍作太平東西南北無思不服

宗陽宮講堂上梁文

青牛車之立教以道授以言傳玉麈尾之談玄其人存
其政舉睠宗陽之主宰實教門之棟梁昔畫宮于塔垂
三十年今自堂祖基為第一義恭惟南谷真人言為世
則心與天通八彩重瞳接清光于堯舜兩儀四象探玄
旨于義文發老子五千言為有用之書去堯夫二百載
得不傳之學無為之為蓋自有道可久則久夫亦何心
丘壑胸中三年種竹十年種木笑談物外左手為矩右
手為規于是植幢蓋于瓦礫之場使城郭有山林之趣

鼓于宮聲于外來霞履于四方跂斯翼暈斯飛振宗風
于千古載陳善頌爰舉修梁

拋梁東吳越平分一水通曉日高懸黃道直蓬萊一葦
起天風

拋梁西空翠濛濛水一堤鐘梵聲中祠太乙星階月地
碧雲齊

拋梁南碧漢河西塔影參坐鎮飛濤跨胥種箭痕吹影
老虬髯

拋梁北北闕巍巍開斗極
虛危垣下繞龜蛇仙佩珊珊
飛白石

拋梁上萬歲千秋開治象
祥風甘雨報豐年四海熙熙
民擊壤

拋梁下薊雨燕雲擁宗社
一堂穆穆衆賢和藪鳳郊龍
無遯野

伏願上梁之後道鈞布物
誨舌懸河垂黍珠于九天遠
者來近者悅湧玉局于大地
統有宗會有元用開後覺

金匱要略卷之十
卷十
一
之天欽祝聖人之壽

醫士求財施藥疏

扁鵲之門不拒病夫蓋欲救已然而防未然狄公之籠
宜多藥物奈何得有限而求無限况俱收並用得宰相
之方而羨補不足乃仁人之事用于達者助我初心將
求施諸已而及之人母曰乞諸鄰而謂之直僮參苓為
君子甘草為國老並蓄良材則邯鄲為婦人咸陽為小
兒大施敏手

吾子行夢蝶壇疏

誦五千言嘗究猶龍之旨以六月息載開夢蝶之壇善
戲謔兮志恠者也載惟真白方丈布衣道士存方寸地
卧百尺樓有淳于髡之滑稽有東方朔之博物賈誼升
堂相如入室惜不用賦于夫子之門李邕識面王翰卜
鄰肯嘆誤身于丈人之聽于是心超蟬蛻之境神游鳥
跡之初遽遽然栩栩然何必扶遙三千里九萬里閭閻
也侃侃也不妨詠歸五六人六七人莫笑邊孝先請問

南華子

朱伊叟注刊詩板疏

古者有采詩之官雖諷詠而必錄人生為垂遠之計豈
言語之可無有如伊叟之賢是亦浙東之秀五十年客
食已愧白頭數百篇詩章豈無青眼况家秘書為之序
引戴翰林重以品題有不逃藻鑑之公大抵出性情之
正笑推敲之未定幾度月明恐傳寫之或多一朝紙貴
乃謀鋟梓誰與揮金或憐心力之窮少賜騷場之賞名

字之立幸不幸敢曰諗癡江海之逢知不知共期愛助

買屋疏

擇遊斯擇居每羨江湖之樂問館必問舍豈無交友之情相與謀一枝之安或者謂諸公之責况錢塘亦士大夫之冀北公安歸乎而西湖豈捷徑者之終南吾無隱爾不用旋栽楊柳何妨高誅梅花須知束書有屋廬便可借車載家具王翰卜鄰李邕識面尚尋杜曲清風司馬買宅鄭公置園猶是伊川盛事允為佳話各載芳題

金匱要略
卷十
代曹彥祥疏

有客清廉以自高當全其節使人阨窮而不憫夫豈其
情有如彥祥之賢實為曹氏之秀夫人自一介而上皆
足以供妻子之歡而公則二年以來惟恪守軍旅之事
其貧如此其守可知不改其樂不堪其憂亦今所少相
照以濕相濡以沫母渝爾音

四聖廷祥觀塑三清聖像請疏

太極渾淪擬形容之是謂象威顏咫尺而神明之存乎

人儼如對於高居信須逢于妙手載惟某人山川秀稟
造化功侔是以似之肖貌天地之性進于技矣遊神元
始之前適從龍漢年中曾入黍珠會上遂令制作超入
空玄自我聰自我明有相之道在其左在其右毋貳爾
心幻成三境之尊欽祝一人之壽

代道錄司賀天師壽

茲審瑞應赤松祥開仙李接龍漢年中之統作天之師
開瑤池宴上之春曰仁者壽歡傳洞府喜溢江山况九

重頒正印之初正羣仙銘新宮之日某濫焉司錄信甚
歡情二十四巖清垣之尊誕揚宗教三十萬里弱水之
隔遙徹頌聲

代四聖觀賀宗師壽

赤松瑞應紫氣春浮秩進公御據東壁圖書之勝教
行海岳儼上界官府之尊光近天顏歡傳人世仰惟某
官性涵太素德合自然為大宗師默贊無為之化弘太
上教恭延有道之長邈象麓之仙源開燕雲之華宴某

等身依此履情切辦香壽道德五千言遙致松椿之祝
望蓬萊三萬里永依桃李之春

賀吳閑閑都提點

道際九重提宗門之正印身為衆父得玄教之單傳賀
溢冠裳歡傳海嶽仰惟某官玄冲而清淨沉潜而高明
大知閑閑窮理盡性以至於命至人默默和光同塵而
淵乎宗鼓大道橐籥之春新上界官府之聽有三寶有
三樂顧舉世之所希無二道無二心合衆妙而為一遂

金匱四庫全書
卷十
令未學屹有旨歸某等踴躍辦香周旋芘厦大宗師之
玄奧德愈盛名愈彰聖天子之簡知祖拜前孫拜後敷
陳言淺欣忭情深

開元宮鐘銘

鼓風霆爐造化范鴻音時旦夜大道鳴皇風駕祝聖人
壽天下

佑聖觀牛鼎銘

道士吳存真募吳德潤金鑄牛鼎銘曰牛斯負鼎斯薰

祝玄武祝聖人

肅堂銘

為昌國李侯作

昌國在絕島中波濤之間鬼神出沒魚鹽舟楫之民正未易治也河間李侯某為刺史三年人愛其樹余不及識侯州文學嚴心傳來為余言侯仁人也構其居以肅堂自號子第銘之余聞行宇宙間者惟風為最神風者造物之橐籥也于春為至仁于秋為至肅今夫春噓枯吹生風之仁也然蘭茝叢生于蕭艾之中蘿蔓生長于

金匱要略卷十
卷十
株林之上仁且有過乎然因材而篤之道則未嘗不整
仁非肅之造乎逮夫金風一行萬物以成妄者彫落真
者聳斂肅豈無功于物乎然伐後之肆食餘之果生意
抽伏正翬翬然肅非仁之濟乎乃為之銘曰天地之間
和氣生物以肅行秋真存妄滅曰仁非肅中有品節曰
肅非仁生意勃勃是曰兼濟柔克剛克予以觀風君子
之德

代賀天師生日呈子

茲審赤松瑞應紫氣春浮作天人之師肇千二百年之
道如山阜之壽開二十四岩之祥垂奕葉之光華植玄
門于永久某身遊琳宇心遡清垣九拜惟恭一誠匪簡
擗麟脯以行酒莫陪上界之羣仙問龍漢以紀年益衍
後天之遐筭下情無任震越祝頌之至

趙蒙齋入道疏


三教並立天地間惟士之末流漫無所向萬事不如雲
水樂而身之將隱何必求文況于今為庶以來亦嘗得

其門而入儻腰纏十萬貫相與成騎鶴之遊則口誦五千言便可究猶龍之旨小子有造諸公慨然

定光寺立經藏吉語

大雄氏以言垂世寶藏興焉公輸子以巧服人金輪遠矣自白馬寺流傳寔廣而大牛車委載弘多如日之布如漢之垂不離文字如天之旋如地之運立透機關手好手中大作莊嚴人非人等皆生歡喜某幸操末技來佐勝因八萬四千母陀羅尼開無盡藏五千四百卷聖

誦義轉不退輪未鎮定光之伽藍仰祝無疆之聖壽



松鄉集卷十